



Torah écrite (pentateuque) - Lévitique

Chapitre 3

- 3,1 ואם-זבח שלמים, קרבנו--אם מן-הבקר, הוא מקריב, אם-זכר אם-נקבה, תמים יקריבנו לפני יְהוָה.
3,2 וסמך ידו, על-ראש קרבנו, ושחטו, פתח אהל מועד; וזרקו בְּנֵי אֶהֱרֹן הכֹהֲנִים אֶת-הַדָּם, על-המזבח--סביב.
3,3 והקריב מזבח השלמים, אשה ליהוה--את-החלב, המכסה את-הקרב, ואת כל-החלב, אשר על-הקרב.
3,4 ואת, שְׁתֵּי הַכְּלִיֹּת, ואת-החלב אשר עלֶהוּ, אשר על-הכסלים; ואת-היתרת, על-הכבד, על-הכליות, וסירגה.
3,5 והקטירו אותו בְּנֵי-אֶהֱרֹן, המזבחה, על-העלה, אשר על-העצים אשר על-האש--אשה ריח ניחח, ליהוה. {פ}
3,6 ואם-מן-הצאן קרבנו לזבח שלמים, ליהוה--זכר או נקבה, תמים יקריבנו.
3,7 אם-בֶּשֶׂב הוּא-מקריב, את-קרבנו--והקריב אותו, לפני יְהוָה.
3,8 וסמך את-ידו, על-ראש קרבנו, ושחט אותו, לפני אהל מועד; וזרקו בְּנֵי אֶהֱרֹן אֶת-דָּמוֹ, על-המזבח--סביב.
3,9 והקריב מזבח השלמים, אשה ליהוה--חלב האליה תמימה, לעמדת העצה וסירגה; ואת-החלב, המכסה את-הקרב, ואת כל-החלב, אשר על-הקרב.
3,10 ואת, שְׁתֵּי הַכְּלִיֹּת, ואת-החלב אשר עלֶהוּ, אשר על-הכסלים; ואת-היתרת, על-הכבד, על-הכליות, וסירגה.
3,11 והקטירו הכהן, המזבחה--לחם אשה, ליהוה. {פ}
3,12 ואם עז, קרבנו--והקריבו, לפני יְהוָה.
3,13 וסמך את-ידו, על-ראשו, ושחט אותו, לפני אהל מועד; וזרקו בְּנֵי אֶהֱרֹן אֶת-דָּמוֹ, על-המזבח--סביב.
3,14 והקריב ממנו קרבנו, אשה ליהוה--את-החלב, המכסה את-הקרב, ואת כל-החלב, אשר על-הקרב.
3,15 ואת, שְׁתֵּי הַכְּלִיֹּת, ואת-החלב אשר עלֶהוּ, אשר על-הכסלים; ואת-היתרת, על-הכבד, על-הכליות, וסירגה.
3,16 והקטירם הכהן, המזבחה--לחם אשה לריח ניחח, כל-חלב ליהוה.
3,17 חקת עולם לדרתיכם, בכל מושבתיכם--כל-חלב וכל-דם, לא תאכלו. {פ}



Voyons plus clair

Une mise en perspective des grandes thématiques de l'actualité à la lueur de l'érudition juive véritable.

Commandez : Tel. (Fr) : +33.1.80.91.62.91 - (Isr) : +972.77.466.03.32 - www.torah-box.com/editions